

Nel de Cuba ta bisa Tico Croes

Si bo tin prueba, entregá keho

ORANJESTAD - Lider interino di fraccion di MEP den Staten, Luis de Cuba a contestá carta di su colega parlamentario, Tico Croes, miembro di fraccion di AVP.

Segun de Cuba, ta dia 15 último el a ricibí carta di **Tico Croes** cual contenido a referí na su discurso na Canal 90 di dia 13 di Juli, den un programa di partido MEP.

Segun Luis de Cuba, lo e contestá segun contenido di carta di Tico Croes, y nos di **Bon Dia Aruba** ta trece esaki integral y literalmente.

A) Riba e asunto cu mi ta un político nobo, mi kier a informá bo cu ta desde aña 1985 mi ta aparecé riba lista di e prestigioso partido político MEP riba invitacion di nos gran lider en feliz memoria Sr. Gilberto François (Betico) Croes.

B) Riba asunto di "e política di MEP ta mentira, corrupcion y ladronicia", mi ta di opinion cu si MEP ta loke bo ta bisa anto bo deber como político hoben, ciudadano y miembro di Parlamento pa entregá keho na Ministerio Público, p'asina esnan cu ta culpabel di corrupcion o ladronicia worde persigui cu e man duro di nos sistema judicial.

Sr. Croes, den e caso aki bo no mester hunga política, pero usa bo deber cívico y actuá. Si bo no por haci esaki: anto bo mester stop di lanza calumnianan contra nos partido.

C) E asunto di cu "e garantíanan no a costa nos pueblo te cu awe ni un sèn preto", lo siguiente. Esaki ta berdad, pasobra Gobierno di Aruba a nenga di paga tur e cobranzanan cu ta sumando mas di 100 milyon dollar, pendiente di e resultado di e investigacionnan cu ta andando.

Sr. Croes, mi ta kere cu na su debido tempo gobierno lo manda e documentonan aki pa Staten. Cu e hecho cu otro hende a bai cu e placa no ta kita afó cu Aruba lo tin di paga esaki.

D) Riba e asunto cu "a pone 2000 amigo político riba payroll di pueblo", mi kier a pidi Sr. Croes pa tene un tiki mas pasenshi, ya cu pronto Staten lo haya e rapport di Contraloría General, den cual ta worde ilustrá cu ta 1200 hende a worde nombrá den gobierno den 4 aña di tempo.

Cu Gabinete Oduber a base di recomendacionnan di

departamentonan di gobierno a yuda e personanan aki cu trabao, mi ta di acuerdo ya cu nunca mi por ta contra cu un tata di famia Arubiano haya un empleo na gobierno di Aruba.

E) Cu a paga sumanan fabuloso na un solo carrental, mi kier a pidi Sr. Croes pa papia cu su colega ex-Minister di Finanzas di Gabinete Eman, ya cu e por duné cifranan fabuloso cu Gabinete Eman a paga na e mesun carrental aki.

F) E number cu bo persona kier duna na e medidanan cu gobierno kier tuma manera bo a yamé, "belasting di ladronicia" o "impuesto di ladronicia", mi ta di opinion cu e number aki por ta mas apropiá, pasobra si bo wak kico a pasa den Beta Hotel, na unda expertonan ta bisa cu e balor di e edificio manera cu e ta awor ta 25 milyon dollar y a worde gastá 65 milyon dollar cual ta garantizá pa gobierno, anto mi tin di asumí cu 40 milyon dollar a desaparecé. Sr. Croes esaki ta LADRONICIA.

Sr. Croes, mi a drenta arena política pa duna un aporte na nos país Aruba, hibando un política franco y sincero, teniendo cuenta cu deseonan di e pueblo di Aruba.

Mi no ta aceptá ningun menaza di ningun hende o político manera bo a expresá den bo carta. Lo mi keda obetivo y si mester duna crítica riba maneho di cualkier gobierno lo mi hacié, semper y cuando esaki ta na bienestar di nos pueblo.

Partido MEP y mi persona semper ta informá nos hendenan den tur barrio di Aruba riba e política cu partido ta hiba y si algun dia nos mester topa otro manera bo a stipulá den bo carta, mi lo no cobradí y lo mi sigui lucha pa loke mi pueblo y mi partido a duna mi como mandato pa lucha.

E rumbo di mi partido pa mas cu 22 aña semper ta y lo keda loke nos lidernan di barrio, votadornan, militancia y pueblo di Aruba exigí di nos. Nos no ta un partido di famia y ni tampoco un partido di personanan cu ta kere cu nan ta mas inteligente cu tur hende na mundo. □

**Bon Dia Aruba
PROME !!!**